



UNIVERSITÄTS-
BIBLIOTHEK
PADERBORN

**Nicolai Lancicii E Societate Iesv Opvscvlorvm Spiritvalivm
Tomvs ...**

Łęczycki, Mikołaj

Antverpiae, 1650

Avctor Lectori Salvtem.

[urn:nbn:de:hbz:466:1-78809](https://nbn-resolving.org/urn:nbn:de:hbz:466:1-78809)



Celsi. 3. c. 4.

ACTVS, & Amicorum precibus, & autoritate Maiorum, mea in lucem proferre Opuscula; monitum esse cupio, quibusdam de rebus, Lectorem. In primis me in iis, non Concionatoris, sed Medici partes agere: ideoque non tam animorum motum, quam aliquam spiritualis medicinae institutionem moliri; profuturam, tum curandis, impediendisque, *Tuto, celeriter, ac iucunde morbis:* (vt faciendum Medicis, suadebat illustri ingenio, & eruditione Asclepiades) tum sanitati tuende, roborandisque viribus, ad eximia quæque, generosè in palæstra virtutis patranda requisitis. Quamquam dicta & exempla Sanctorum, quibus copiosè mea documenta illustro, & fidem, pondusque, meis oculis, veterum auctoritate, concilio, amplam suppeditare poterunt cuius, piorum materiam & occasionem affertuum. Sæpe meis Opusculis infero, Sanctorum quarumdam insignium, præclara, & ignota multis monita: tum vt Confessarij, ac Concionatores, Deo dicatarum Virginum, in promptu habeant, dicta & facta sexus eiusdem, tanquam illarum accommodata gustui, ideoque ad illas iuandas efficaciora: tum vt curiosus Lector, qui hoc nimis delicato sæculo, vt ait Dacryanus Abbas, *consuetas, & vetera, quantumuis utilia fastidit: & cui nihil sapit, nisi quod nouum est, & inauditum;* non tantum per excerptas, ex notis Ecclesiæ Doctorum monumentis, sed per has quoque (quas in rarioribus ac minimè peruiis illarum libris, non legerat) doctrinas, proficiat; tum vt alij, præsertim harum Sanctorum clientes, & ipsi in Dei semitis, currant velocius; & alios excitent, etiam teneri sexus ac debilis, vocibus, vestigiisque attracti, Præsertim cum pleræque Sanctorum istarum doctrinæ, publico summorum Pontificum iudicio, tanquam ab ipso Deo immediatè docente, per Sanctam Brigittam, & Sanctam Catharinam Senensem, sint traditæ: aliæ verò, conformes in omnibus, incorruptis sanctorum Patrum, ac Scholasticæ Theologiæ Doctorum placitis, à S. Teresa, ac B. Maria Magdalena de Pazzis, ac similibus, diuinitus edoctis, manarint. Quarum eximia & numquam satis laudata sanctitas, Apostolicæ Sedis Decretis, per publicos in Ecclesia honores, etiam in Sacrificio Missæ, ac Martyrologio Romano est declarata: & quarum cælestes, pro vita spirituali regenda præceptiones, eximiorum Theologorum, ac probatorum vitæ spiritualis Doctorum, calculo, sunt maximoperè commendatæ, tanquam indubiâ fide, ac imitatione dignissimæ. Harum ergo, & antiquorum S. Ecclesiæ Doctorum sententiis, mea veluti animans Opuscula, audeo & ego, post accuratos aliorum Tractatus, rerum diuinarum scientiam, egregiè explicantibus, mea quoque monita seu consilia, tanquam pauca panum fragmenta, collecta è Christi conuiuio, vitæ spiritualis Tironibus, aliisque offerre; ac multa suggerere: quæ pietatis cultores, vel discant legendo, vel, si didicerunt antea, meminerint, aut toto conatu fugere & corrigere, aut diligenter quærere, & acquisita plenè perficere: ac excelsi sublimitate animi, altissimas Heroum cælestium virtutes, imitando prensare. Quò, hac ratione, ob supremi Numinis reuerentiam, & amorem (quemadmodum loquitur Theodoretus) *in corpore mortali & patibili, incorpoream amulentur naturam: & per imitationem eius, quæ in calis est, viuendi rationis, omnem Sanctorum virtutem exprimant.* Hanc ob causam, dabo, Deo adiuuante operam, vt perfectissima quæque, in Deo, & Sanctis eius, imitanda proponam, & summos perfectionis Euangelicæ apices ostendam. Quia vt præclare docuit S. Gregorius Nazianzenus: *Medici animarum scopus est, anima pennas addere, ac mundo eam eripere, Deoq; dare: diuinamq; imaginem, aut manentem conseruare, aut periclitantem fulcire, aut dilapsam in pristinum statum reuocare, Christumq; per Spiritum sanctum, in pectoris domicilium admittere: atque vt summatim dicam, eum qui superioris agminis sit, Deum efficere, supernam beatitudinem ipsi comparare. Huc magistra lex tendit: huc exinanita Deitas: huc assumpta Caro.* Quocirca, vt idem hortatur alibi: *Simus vt Christus, quoniam Christus quoque sicut nos: efficiamur Dii propter ipsum, quoniam ipse quoque propter nos homo factus est.* Vale, & Deum ac Sanctos eius, pro me ora, vt inchoata perficiam, & tuæ animæ, ac meæ, his Opusculis, quam maximè profim.

Bonif. IX.
Mari. V.
Pius II.
Paulus V.
Urban. VIII.

in prol. rel.
hist.

Orat. I.

Orat. 4 in
Paschate.